



Sensibilité politique
Boîte postale 83
L-7201 Bereldange

Fernand ETGEN
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 12/11/2019

Här President,

Sou wéi den Artikel 83 vun eisem Chambersreglement et virgesäit, bidden ech lech, dës parlamentaresch Fro un de Minister fir Aussenugeleeënheeten an Europa weiderzeleeden.

De 9te November 2019 huet d'ASBL Rosa Lëtzebuerg ee Bréif un den Ausseministère adresséiert, an dem si op d'Ënnerdréckung vun der LGBTIQ*-Communautéit an der Tierkei opmierksam maachen. An dësem Bréif mécht d'ASBL dorop opmierksam, dass d'tierkesch Force publique den 10te Mee 2019 gewaltsam géint d'Organisateure an d'Participante vun engem LGBTIQ*-Pride-Event virgaange sinn. Studenten an en Akademiker goufe stroferechtlech verfollegt an zum Deel festgeholl. Eng Gerichtsverhandlung ass fir haut virgesinn.

Säit dem Ausruff vum Ausnamezoustand an der Tierkei si Manifestatioune vun der LGBTIQ*-Szeen am Viséier vun der Regierung zu Ankara. International Mënscherechtsorganisatiounen hunn dësen Teschefall an déi systematesch Ënnerdréckung vun de LGBTIQ*-Szeen veruerteelt.

Lëtzebuerg huet international eng Virbildfunktioon an der Verdeedegung vun de Rechter vun der LGTBIQ+-Communitéit ageholl, dëst ënnert anerem duerch dem Premierminister seng faméis Ried am Februar 2019 virun der Arabescher Liga, wou hien sech fir d'Rechter vun LGTBIQ*-Rechter staark gemaacht huet.

An deem Zesammenhang wéilt ech dem Minister dës Froe stellen:

1. Wéi schätzt den Ausseminister déi aktuell Lag vun der LGTBIQ*-Communautéit an der Tierkei an?
2. Ass de Minister der Meenung, dass d'Versammlungsrecht vun der LGBTIQ*-Communautéit nach respektéiert gëtt?
3. Wäert d'Regierung sech bei der tierkescher Ambassade fir d'LGTBIQ*-Communautéit an der Tierkei staark ze maachen? Falls jo, wéi eng Positioun vertritt d'Regierung ?
4. Wéi eng Efforte wäert Lëtzebuerg ënnerhuelen, fir d'Rechter vun der LGTBIQ*-Communitéit an der Tierkei, mee awer och am Rescht vun der Welt, ze stäerken?

Mat déiwem Respekt,



www.piraten.lu



Sensibilité politique
Boîte postale 83
L-7201 Bereldange

GOERGEN Marc
Député



www.piraten.lu